



Jo mi soi sposade il mês di Avost dal 1977 (un cjalt di murî), a 22 agns, dopo 7 agns di morosament.

O jeri cussì su la lune pa la emozion, che dal dì des gnocis no mi visi nuie di nuie.

Di bon che o ài l'album di fotografiis se no mi vignarès il sospiet di jessimalu insumiât.

Però o ài simpri in ment ce che o vevi cumbinât cualchi dì prin, cjapâde come che o jeri dai preparatîfs e da la premure di fâ dut in regule: i invîts, lis bombonieris, il rinfresc, lis rosis, il predi, il banchet, la musiche e... il rest.

Po ben, cuant che o soi lade a ritirà il vistît di nuvice, tal Empori dulà che un pôc a la volte o vevi comprât dut il furniment e là che dal paron ai comès mi cognossevin ducj, busse un, ringracie chel altri, o saludi ducj e vie jo cul pac sot il braç... cence fermâmi in casse a paiâ. Cuant che o soi tornade in me, o jeri beromai su la puarte, cence che nissun al ves olsât a fermâmi.

La vee di gnocis a une nuvicjute si perdone dut, ma jo, cuant che mi impensi, o deventi ancjemò rosse.

di Maghe Olstrele